

stampar, *sub poena* etc., per anni 10. Ave 125, 12, 6. Fu presa. E nota. È sier Alvise di Prioli il vecchio, qual parla malissimo, e non il zovene.

Fu posto, per li Savii dil Conseio e Terraferma, che certa differentia dil clero di Padoa e altri frati con li frati di Santa Justina di Padoa, per causa di l'estimo fato 1521 et fu posto una assignation di ducati 1700 a li monasterii, pertanto sia preso che la ditta differentia sia comessa a li rectori di Padoa, le appellation vadino alle Quarantie Civil, et sia suspeso *pro nunc* dita assignation, et, non havendo li rectori expedi in termene di mexi 6, sia la causa posta de fato a le Quarantie preditte, *ut in parte*. Ave: 138, 0, 6.

169* Fu posto, per sier Alvise Gradenigo, sier Leonardo Emo, savii dil Conseio e li Savii a Terraferma, excepto sier Mathio Dandolo, et li Savii ai Ordeni, non era sier Matio Trivixan, una parte che hessendo stà balotà il mandato di sier Vetur di Garzoni, qual à tolto una galia in Barbaria, per aver dà la piezaria, et non potersi servir di soi doni, in Collegio non è stà preso, pertanto sia preso che, senza altra balotation di Collegio, possi operar li soi doni, e cussi a li altri do patroni, dando le sue piezarie, aziò possino metter bancho e andar al suo viazo.

Et a l'incontro sier Luca Trun procurator, sier Gasparo Malipiero, savii dil Conseio, sier Mathio Dandolo, savio a Terraferma, messeno, atento non hanno li patroni auto il salvoconduto di Sicilia nè da Tunis, et esser Barbarossa corsaro con assà velle et altri corsari sul mar, perhò andando al viazo anderiano con gran pericolo, pertanto sia deferito *pro nunc*.

Et parlò primo sier Gasparo Malipiero, non vol le vadi, dicendo, messer Andrea Doria ha 25 galie e dubita di Barbarossa, et nui volemo mandar a perder le ditte galie.

Et li rispose sier Bernardo Capello qu. sier Francesco el cavalier, savio ai Ordeni, che le andasse.

Dapoi andò in renga sier Luca Trun procurator preditto, per l'indusia. Et li rispose sier Alvise Gradenigo, è bon, ch'el fa per la terra, che le galie navigi, e non bisogna tanta paura. Andò le parte: 73 Gradenigo et Emo, 80 Trun, 0, 10. *Iterum*, 75 Gradenigo, 82 Trun, 5 non sincere, e fu presa.

Fu posto, per sier Piero Mocenigo savio a Terraferma, una parte che, atento le gran pregierie si fa, *de coetero* li Savii a Terraferma, che saranno electi, si fazino con pena, nè possi esser tolti altri cha

quelli saranno remasti ordinariamente di Pregadi o di la Zonta et di mazor dignità, *ut in parte*. Et la presente parte non se intendi presa, si la non sarà posta nel nostro Mazor Conseio. La copia sarà qui avanti scritta.

Et sier Carlo Capello, savio a Terraferma, messe un scontro; vol, *de coetero* li ditti Savii a Terraferma siano electi con pena et possino esser provadi cadauno come si fa al presente.

Andò le parte: 2 non sincere, 6 di no, 59 dil Capello, 104 dil Mocenigo, et fu presa.

Fu posto, per li Consieri, excepto sier Domenego Capello non si pol impazar, Cai di XL, et Savii, excepto sier Alvise Mozenigo el cavalier, dar li danari a sier Carlo Capello, va orator in Anglia.

Et sier Alvise Mocenigo el cavalier andò in renga, non vol butar via quelli danari, nè mandar orator in Anglia. E un'altra volta, il mexe di fevrer, fu voluta meter questa parte, et ditto sier Alvise volse contradir, e non fo mandata, cussi ora non fu mandata; l' hora erra tarda, fo rimessa a un altro Conseio.

Fu posto, per sier Hironimo Quirini, sier Michiel Morexini, proveditori sora l'Arsenal, una parte di far uno libro a l'Arsenal, con molte clausule, per Andrea Felato rasonato, di le deputation fate et di quello si averà auto, *ut in parte*. Ave 133, 11, 6.

In questa sera in Gelo fu fato tra zudei una bellissima comedia, nè vi potè intrar alcun cristian di ordine di Cai di X, et la compiteno a hore 8 di notte.

Questi sono li capi di fantarie a provision, 170 et dove i se pagano.

Brexia.

Colonelli

Babon di Naldo	ducati 66
Iacometo da Novelo	» 40
Guido di Naldo	» 40
Domino Piero Sagredo	» 14
Cesaro Graso	» 14
Piero Maria Aldrovaldin	» 14
Piero Francesco d' Ancona	» 14
Octavian Vaylà	» 12
Maria da Castello	» 12